

Kepakaran teknikal UTeM jadi rujukan di pentas dunia

Kepakaran Universiti Teknikal Malaysia Melaka (UTeM) dalam bidang teknikal dalam kalangan negara beriklim tropika terus menjadi perhatian di pentas dunia apabila universiti itu dijemput menjadi sebahagian daripada ahli dalam rangkaian universiti global baharu, Liga Universiti Tropika pada Majlis Pelancaran dan Persidangan Kemuncak Sulung Liga Universiti Tropika di Hainan, China, baru-baru ini.

Lebih membanggakan apabila UTeM adalah satu-satunya universiti dari kalangan Rangkaian Universiti Teknikal Malaysia (MTUN) yang menyertai liga ini.

Naib Canselor UTeM, Profesor Datuk Ts Dr Massila Kamalrudin berkata, pembabitan



PAKAR UTeM Hazman (dari kiri), Prof Madya Mohd Rahimi dan Prof Dr Hambali mewakili UTeM pada Majlis Pelancaran dan Persidangan Kemuncak Sulung Liga Universiti Tropika di Hainan, China.

UTeM dalam liga ini secara tidak langsung memperlihatkan kepercayaan yang diberikan berteraskan

pencaapaian cemerlang UTeM dalam bidang akademik, teknikal dan penyelidikan secara berterusan di pentas

antarabangsa. Menurutnya, Liga Universiti Tropika yang disertai 40 universiti ternama dari benua Asia,

Afrika dan Amerika Selatan ini menyediakan platform kerjasama bagi memudahkan perkongsian sumber, pembangunan bakat, penyelidikan bersama, pemindahan teknologi dan inovasi dalam kalangan ahli menggunakan pendekatan berasaskan komuniti serta kerjasama dengan mengambil kira keutamaan kawasan.

“Penyertaan UTeM pada persidangan sulung ini turut memberi peluang kepada UTeM menjayakan perancangan aktiviti jalinan kerjasama mampan bersama ahli liga yang lain merentas tiga benua Asia, Afrika dan Amerika Selatan.

“Pada masa sama, liga ini juga akan merencanakan aktiviti berkaitan Matlamat Pembangunan Mampan (SDG) 17

Partnerships for the Goals dan SDG4 Quality Education.

“Ini adalah selari dengan idea penubuhan Liga Universiti Tropika sejajar dengan pendekatan Pertubuhan Bangsa-Bangsa Bersatu (PBB) dalam memastikan transformasi sains ke arah pencapaian SDG untuk 2030,” katanya.

Pada persidangan ini, UTeM diwakili tiga tenaga pakar iaitu Dekan Fakulti Teknologi dan Kejuruteraan Industri dan Pembuatan (FTKIP), Prof Dr Hambali Arep@Ariff, Pengarah Pusat Pengurusan Strategik, Kualiti & Risiko (PPSKR) Prof Madya Mohd Rahimi Yusoff dan Timbalan Pengarah Pusat Hubungan Strategik Korporat & Global (UGlobe), Hazman Hasib.